

EBIET UDIBE YE IDARESIT EDINEN OWO

Psalm 91:1-16

QYQHỌ UKPEP-ÑKPỌ 83

Eke Ikpọ Owo

IKỌ IBUOT: “Enye eyeda ntañ Esie ofuk fi, afo eyenyuñ efehe oduk ke idak mba Esie: akpanikọ Esie edi otu-ekọñ eke ekpemedede fi” (Psalm 91:4).

I Ndibe Usuñ Ndinyene Ukpeme Abasi

1. Akam edi se eyomde - “Enye eyeseme ọnọ mi,” Psalm 91:15; Utom Mme Apostle 2:21
2. Ndikot Ikọ Abasi edi akpan ñkpọ, - “Akpanikọ esie edi otu-ekọñ eke ekpemedede fi,” Psalm 91:4; Job 23:12; Psalm 119:11
3. Mbuqtidem edi erikan - “Nyebuqt idem mi ye enye,” Psalm 91:2, I John 5:4
4. Ndisuk ñka iso edi ata akpan ñkpọ, - “Owo eke etiede. . . ,” Psalm 91:1, 9; Matthew 10:22
5. Ndimma nnyuñ mfiok Abasi ọnọ nsinsi ubọhọ, Psalm 91:14; John 17:3; Psalm 9:10

II Qyqhọ Ukpeme Abasi

6. “Koro Enye eyesio fi,” Psalm 91:3
7. “Tọsin owo eyeduqñ . . . edi idisimke fi,” Psalm 91:7, 8
8. “Enye eyewuk mme angel esie abaña fi,” Psalm 91:11, 12; Mme Hebrew 1:13, 14

III Ndusuk Ntak Ndidara

9. “Afo udufeheke ñkpọ ndik,” Psalm 91:5, 6; 2 Ñwed Timothy 1:7
10. “Baba idiok-ñkpọ idisimke fi,” Psalm 91:10
11. “Nyeda ediwak usen nyuhọ enye, nnyuñ ñwut enye erinyaña mi,” Psalm 91:16
12. Mme abak Abasi enyene erikan, - “Afo eyedighi lion,” Psalm 91:13
13. “Nye. . . ñkpono enye,” Psalm 91:15.

SE EKPEPDE EBAÑA

Ndisie

Psalm emi owut nte Abasi ekpemedede ikọt Esie. Enye owut nte Abasi atañde nditọ Esie obok ke idak mba Esie, nte emi eka unen anamde ye nditọ. “Enye eyeda ntañ esie ofuk fi, afo eyenyuñ efehe oduk ke idak mba esie.” Jesus akada ukem usuñ emi etiñ ndiwut uduak Esie ke abaña Jerusalem, “Adaña ediwak ini didie ke ñkoyom nditañ nditọ fo mbon ọtọ kiet, kpa nte unen obonde nditọ esie ke idak mba esie, ndien mbufo ikonyimeke!” (Luke 13:34).

Ke ini afanikọñ, owo esiyom ubọhọ ye ukpeme emi otode Abasi, edi mmọ inyimeke ndinam ñkpọ emi odotde mmọ ndiduk ke idak mba Esie. Mme eñwọñ Psalm emi enyene mmọ oro eduñde ke ndibe ebiet Ata Edikoñ. Owo osim ebiet oro oto ke Iyip Christ. Mbemiso owo ekeme ndiduñ ke ndibe ebiet oro, enye enyene ndikabare esit ñkpọñ idiok-ñkpọ esie nnyuñ mbọ erifen. “Koro enye ọfiokde enyiñ mi,” owut ebuana emi owo enyenede ye Abasi oto ke ifiok edimana obufa. “Ndien nsinsi uwem oro edi ndifiok Fi, ata Abasi kierakiet, ye Enye emi Afo ọkọdọñde, kpa Jesus Christ” (John 17:3).

Ndiduñ

Ke ini owo oduñde ke ndibe ebiet, (oro edi ọbọ ata erinyaña) edi akpan ñkpọ ndiduñ do man enye enyene udeme ke ukpeme emi enode. Nte ekewutde, eyen unen enyene ndidu ke idak mba eka man ọbọhọ, ke ntre ke ana nnyin iduñ ke mfut mba Esie. Sia Ñwed Abasi ọdọhọde ete, “Afo omonim Ata Edikoñ ke ebiet iduñ fo,” nnyin ke ntre inyene ndika iso nduñ ke Ọbọñ. Edi mmem-mmem ndikọbọ erinyaña ini kiet ko nnyuñ nduñ ke idak ukpeme Ata Ọkpọsọñ, ndinyuñ nyo mkpọñ usuñ nnyuñ ntak ke nsinsi. Ke ntre edi akpan ñkpọ ndisọñda. Jesus ama ọdọhọ ete, “Edieke mbufo esọñde eda ke ikọ Mi, mbufo edi mbet Mi ke akpanikọ” (John 8:31). Etop emi Abasi ọkọdọñde ebe ke Ezekiel ekedi, “Eti ido eti owo idinyañake enye ke usen eke enye eduede” (Ezekiel 33:12). Edieke afo edide kiet ke otu mmọ emi ekekpọñde mfut mba Esie, afo odu ke ata idiok itie, koro edieke akpade ye idiok-ñkpọ fo, afo eyetak ke nsinsi. Sọp fiak ini kiet koduk ke idak ukpeme Esie. (Ezekiel 33:11; Deuteronomy 33:27).

Akam

Kiet ke otu mme ñkpọ emi owo Abasi anamde man ọsuhọ ye Ọbọñ edi ndibọñ akam eti-eti. “Enye eyeseme ọnọ Mi.” Jesus ama ọnọ nnyin eñwọñ, “Nyenyuñ nnam ñkpọ ekededi eke mbufo edibeñede ke enyiñ Mi” (John 14:13). Enye onyuñ ekpep nnyin ete, “Mme owo ekpebọñ akam kpukpru ini” (Luke 18:1).

Ikọ Abasi

Owo emi oduńde ke ndibe-ebiet enyene ndibere ke Ikọ Abasi man ọbọ odudu ye nda-usuń. “Akpanikọ esie edi otu-ekọń eke ekpemedede fi.” Ke ini andidiok okodomode Jesus, Enye ekebere ke Ikọ Abasi. Ndisọńọ nda ke Ikọ Abasi esińwam nditọ Abasi ndisańa mbe mkposọń ebiet. Owo emi okodude ke otu mme otop bọm ke Ekọń Ofuri Ererimbot ọyọhọ iba, etiń nte enye ekeberede ke eńwọńọ Psalm emi, ke mme isań utom mmọ utim ike edip ye efut ke Japan. Eńwọńọ oro ama ada enye ebe ikpọ mkpasip-ikań onyuań ekpeme enye ke ufot ubom-ofum ekọń. Enye ama ọnyọń edisim ufok ke ifure, okposuk edi ini kiet idiok ọtọmbe emi ekotde (shell) okobuberede asuana ńkpọ nte ikpat iba ọkpọń ebiet emi enye akanade.

Mbuotidem

“Nyebuot idem mi ye enye.” Ada mbuotidem ke Abasi ndisọńọ nda ke mme eńwọńọ Esie. Ke mbuotidem miduhe owo ikemeke ndinem Abasi esit. Edi se mme ikpọ ńkpọ emi adade itie oto ke ndibuot idem ye Abasi! Jesus ama ọdọhọ owo nnan ete: “Ka okuo; mbuotidem fo ama anyańa fi” (Mark 10:52). Ewet ke ńwede Abasi ete ke oto ke mbuotidem mbon eyo oko, “ekan mme idut, enam edinen ido, ebọ mme uńwọńọ, ekibi mme lion inua, enime ide ikań, ebọhọ iso ofut, ewọńọ ekpọń mmemidem ekabare ekop idem, ewọńọ edi uko ke ekọń, enyuań enam udim ekọń mme idut efeńe” (Mme Hebrew 11:33, 34).

Ukpeme

“Afo udufeheke ńkpọ ndik.” Nso utọ utibe eńwọńọ! Owo anam kpukpru se enye ekekeme ndibọhọ mme ńkpọ oro enamde enye ndik. Enye anam mbet ye ekikere ndińwam idem esie nsio ke unana edieke unọmọ otibede, udọńọ ye ini usọń. Edi ke Abasi ikpọń ke ekeme ndibọhọ ndik. Enọ owo Abasi akwa mbuotidem oto ke ndifiok nte ke “kpukpru ńkpọ esańa ọtọ kiet enam ufọn enọ mmọ eke emade Abasi” (ńwede Mbon Rome 8:28). Ukpeme Abasi ye ikot Esie ayarade ke ediwak idaha. Kere bańa ukpeme Esie ye Nditọ Israel ọtọńode ke Egypt tutu ekesim Isọń Eńwọńọ. “Enye eyewuk mme angel esie abańa fi” ọsọńọ owut ete ke baba ńkpọ kiet iditibeke inọ owo Abasi ke Abasi minyimeke. Idorenyin ye inyene owo Abasi edu ke Heaven, ndien inamke ńkpọ edieke Abasi okutde ete ọfọn ndikot enye nsio ke ererimbot emi, ke ini uyen esie mme ke ini usọń. Idorenyin idiok owo odu ke ererimbot ikpọń, ndien ndisobo ye “usiene mme oburobut owo” edi nditak ke nsinsi. Okposuk edi ke ediwak idaha owo Abasi ye idiok owo ekeme ndikpa ke ikpohidem ke ańwa ekọń kiet, edi utip mmọ enyene akamba ukpuhọre. Ukpọń owo Abasi ke ndo-ndo oro eyenyọń Heaven, ke ini ukpọń idiok owo atakde ke hell ke nsinsi.

Erikan

“Afo eyedigi lion ye ibọm.” Owo Abasi inyeneke ukpeme ke abańa eńwan asua ukpọń esie ikpọń, edi ọbọ uko ndiwọrọ nkańwana ńko. Paul ama ekeme ndidọhọ ete: “Edi yak ekọm enyene Abasi, emi ọńode nnyin erikan, oto ke Ọbọń nnyin Jesus Christ” (I ńwede Corinth 15:57). Eńwọńọ Abasi ye Israel ekedi “Owo mbufo kiet eyebine tọsin” (Joshua 23:10). Mme eńwọńọ erikan ke mme ńkpọ ikpohidem emi ekenode Israel ikanke mme eńwọńọ erikan ke spirit emi enode ikot Abasi mfin. Psalm erikan emi etre ye mme eńwọńọ edifak-nsio, ukpono, anyan uwem, uyuhọ, ye erinyańa ukpọń.

MME MBUME

1. Ndiduń ke “ndibe ebiet Ata Edikoń” ọwọrọ didie?
2. “Afia ata-ikot” ọwọrọ didie? Ndien ekeme ndida oro ndomo ye nso ke ńkań spirit?
3. Ewe ufań ke ńwede Abasi edi ukem ye ufań itiaba?
4. Nso idi ukpuhọre ke “Usiene mme oburobut owo” ye eke ndinen owo?
5. Mme anie ekpeme ndinen owo? Ewe ufań efen ke ńwede Abasi edi ntiense abańa emi?
6. Siońo nsuhọre ńkaha ufań ita emi ewutde ete ke mme eńwọńọ Psalm emi enyene mmọ emi ebode erinyańa ukpọń.
7. Ewe ufań owut mbuotidem ke Abasi?
8. Siak kpukpru mme eńwọńọ emi ekemedede ndikut ke Psalm emi.